



REPUBLIKA E SHQIPËRISË

MINISTRIA E FINANCEVE DHE EKONOMISË

MINISTRI

Nr. 8067 Prot.

Tiranë, më 8 / 5 2020

UDHËZIM

Nr. 18 Datë 8.5 2020

**PËR ORGANIZIMIN E MËSIMIT, VLERËSIMIN E NXËNËSVE, PROVIMET
PËRFUNDIMTARE DHE MBYLLJEN E VITIT SHKOLLOR 2019-2020 NË
SHKOLLAT PROFESIONALE PUBLIKE DHE JOPUBLIKE, NË KUSHTET E
GJËNDJES SË FATKEQËSISË NATYRORE TË SHKAKTUAR NGA PANDEMIA E
COVID-19**

Në mbështetje të pikës 4 të nenit 102 të Kushtetutës, të nenit 7 shkronja b të ligjit nr. 15/2017, "Për Arsimin dhe Formimin Profesional në Republikën e Shqipërisë", të vendimit nr. 18/2020, të Kuvendit të Republikës së Shqipërisë, "Për dhënien e pëlqimit për zgjatjen e gjendjes së fatkeqësisë natyrore" dhe të pikës 6.1 të vendimit nr. 243, datë 24.3.2020, të Këshillit të Ministrave, "Për shpalljen e gjendjes së fatkeqësisë natyrore",

UDHËZOJ:

1. Në lidhje me vijimin e mësimin online dhe rikthimin e maturantëve në shkollë:

- a) Për nxënësit e klasës 10 (të gjitha strukturat arsimore), të klasës 12 (struktura arsimore 2+2) dhe të klasave 11 dhe 12 (struktura arsimore bllok 4 vjeçare), mësimi në kushtet e shtëpisë do të vijojë deri në datën 29.05.2020 duke synuar një pjesëmarrje sa më të madhe dhe sa më aktive të nxënësve.
- b) Për nxënësit e klasave 11 dhe 12 (struktura arsimore 2+1+1) dhe të klasës 11 (struktura arsimore 2+2), të cilët kanë provime të nivelit, mësimi në kushtet e shtëpisë do të vijojë deri në datën 29.05.2020 duke synuar një pjesëmarrje sa më të madhe dhe sa më aktive të nxënësve.
- c) Për nxënësit maturantë, në klasën 13, mësimi në kushtet e shtëpisë do të vijojë deri në datën dt.15.05.2020 duke synuar një pjesëmarrje sa më të madhe dhe sa më aktive të nxënësve.
- d) Për nxënësit maturantë, mësuesit e lëndëve të kulturës së përgjithshme, që **NUK janë pjesë** e provimeve të Maturës Shtetërore Profesionale, do ta mbyllin realizimin e programit mësimor në datën e hyrjes në fuqi të këtij udhëzimi.

- e) Për nxënësit maturantë, mësuesit e lëndëve të teorisë profesionale që **NUK janë përfshirë në Provimin e Teorisë Profesionale të Integruar** (sipas Programit Orientues përkatës), do ta mbyllin realizimin e programit në datën e hyrjes në fuqi të këtij udhëzimi.
- f) Për nxënësit maturantë, në periudhën 08.05.2020 – 05.06.2020, do të vijojë mësimi në shkollë sipas Urdhrit Nr. 103, datë 27.04.2020 të Ministrisë së Arsimit, Rinisë dhe Sporteve.
- g) Për nxënësit maturantë, përqëndrimi i mësimi në kushtet e shtëpisë dhe gjatë kthimit në shkollë do të jetë parapërgatitja për katër provimet e detyruara të Maturës Shtetërore Profesionale. Gjatë kësaj periudhe do të zhvillohet vetëm **përsëritje** bazuar në Programet Orientuese të rishikuara përkatëse, të publikuara nga (Agjencia e Sigurimit të Cilësisë në Arsimin Parauniversitar (ASCAP) dhe Agjencisë Kombëtare të Arsimit, Formimit Profesional dhe Kualifikimeve (AKAFPK).
- h) Shkollat profesionale përgatisin orarin e ri për realizimin e mësimi për nxënësit maturantë gjatë periudhës së rikthimit në shkollë.
- i) Për nxënësit maturantë, vijueshmëria e mësimi në shkollë do të realizohet sipas pikave 6 dhe 7/a, c, f, g të Urdhrit të ASCAP, nr. 45, datë 29.04.2020 “Për organizimin e mësimi, vlerësimin e nxënësve dhe mbylljen e vitit shkollor 2019-2020, për klasën 12”, **të zbatuara për klasën 13 në shkollat profesionale.**
- j) Për nxënësit e klasave të cilët do të kryejnë Provimin e Teorisë Profesionale të Integruar të Nivelit online, përqëndrimi i mësimi në kushtet e shtëpisë, do të jetë parapërgatitja dhe përsëritja në lëndët që përfshihen në këto provime, bazuar në Programet Orientuese përkatëse të publikuara nga AKAFPK, **duke marrë në konsideratë lëndët dhe temat e realizuara deri në 9 mars 2020, sipas evidencave në regjistrave përkatës në shkollë.**

2. Në lidhje me provimet përfundimtare

- a) Provimet e Maturës Shtetërore Profesionale (Gjuhë shqipe dhe letërsi, Matematikë, Gjuhë e huaj e parë dhe Teori Profesionale e Integruar) do të zhvillohen në periudhën 08.06.2020 – 18.06.2020.
- b) Modalitetet e realizimit të provimeve të Maturës Shtetërore Profesionale përcaktohen me Udhëzimin e përbashkët të MASR dhe MFE nr. 27, datë 26.11.2019 “Për organizimin dhe zhvillimin e provimeve të Maturës Shtetërore Profesionale 2020”, me Rregulloren për zhvillimin e Maturës Shtetërore 2020 në Republikën e Shqipërisë, miratuar me Urdhër të Ministrit nr. 537, datë 08.11.2019, si dhe udhëzimet në vijim të Ministria e Arsimit, Rinisë dhe Sporteve (MASR) dhe të Qendrës së Shërbimeve Arsimore (QSHA) për këtë qëllim.
- c) Provimet e Praktikës Profesionale të Integruar të Nivelit, **nuk do të zhvillohen.**
- d) Provimet e Teorisë Profesionale të Integruar të Nivelit, për nxënësit e klasave 11 dhe 12 (struktura 2+1+1) dhe të klasës 11 (struktura 2+2), **do të zhvillohen online në periudhën 08.06.2020 – 12.06.2020.**
- e) Për Provimet e Teorisë Profesionale të Nivelit online, grafiku i provimeve, përgatitja e testeve teorike, skema e vlerësimit të testit, realizimi i provimit online, korigjimi dhe nxjerrja e rezultateve (notave) do të kryhen nga komisionet e vlerësimit përkatëse të çdo shkolle profesionale, sipas udhëzimit Nr 15, datë 26.04.2019 “Për organizimin dhe zhvillimin e provimeve përfundimtare në arsimin dhe formimin profesional”.
- f) Testi i Teorisë Profesionale të Nivelit online do të përmbajë 25 njësi testi me zgjedhje (alternativa) dhe koha që do t’u jepet nxënësve për plotësimin online do të jetë 60 minuta.

- g) Përmbajtja e testit online do të bazohet në Programin Orientues përkatës të publikuar nga AKAFPK. Në këtë test nuk do të përfshihen pyetje që i referohen programit mësimor të realizuar online pas datës 09.03.2020 (sipas evidencave të regjistrave përkatës).
- h) Mënyra e realizimit të testit online (programet, aplikacionet, mjetet) përcaktohen nga komisionet e vlerësimit përkatëse të shkollave, duke synuar rritjen e pjesëmarrjes së nxënësve, ruajtjen e fshehtësisë dhe shmangien e fiktivitetit në provim.
- i) Për nxënësit që do ta kenë të pamundur të marrin pjesë në provimin e Teorisë Profesionale të Integruar të Nivelit online, në përshtatje me rrethanat dhe kushtet që do të krijohen në vijim, do të jepen udhëzime të mëvonshme për të mundur edhe realizimin e këtij provimi.

3. Në lidhje me vlerësimin e nxënësve

- a) Për nxënësit maturantë, vlerësimi i vazhduar dhe përcaktimi i notës vjetore për lëndët e kulturës së përgjithshme do të bëhen sipas pikës 8 të Urdhërit të ASCAP, nr. 45, datë 29.04.2020 "Për organizimin e mësimi, vlerësimin e nxënësve dhe mbylljen e vitit shkollor 2019-2020, për klasën 12", të zbatuar për klasën 13 në shkollat profesionale.
- b) Për nxënësit e klasave 10, 11 dhe 12, vlerësimi i vazhduar dhe përcaktimi i notës vjetore për lëndët e kulturës së përgjithshme do të bëhen sipas udhëzimeve të MASR.
- c) Për të gjithë nxënësit që marrin pjesë në mësimin online, bëhet vlerësimi i vazhduar me nota për lëndët profesionale dhe modulet (projektet mësimore) profesionale duke konsideruar angazhimin dhe rezultatet e arrituara.
- d) Nota përfundimtare vjetore për lëndët profesionale dhe modulet (projektet mësimore) profesionale do të llogaritet duke konsideruar notat e marra nga nxënësi gjatë mësimi në shkollë dhe gjatë mësimi online.
- e) Për nxënësit që e kanë patur të pamundur të marrin pjesë në mësimin online, nota përfundimtare vjetore për lëndët profesionale dhe modulet (projektet mësimore) profesionale do të llogaritet duke konsideruar vetëm notat e marra gjatë mësimi në shkollë, para datës 09.03.2020.
- f) Nota e Provimit të Praktikës Profesionale të Integruar të Nivelit, për çdo nxënë (përfshirë dhe nxënësit maturantë) do të llogaritet si mesatare e thjeshtë, e rrumbullakosur në numër të plotë, e notave të moduleve praktike (projekteve mësimore) që nxënësi ka përmbyshur në nivelin përkatës.
- g) Për nxënësit që e kanë patur të pamundur të marrin pjesë në mësimin online, nota e Provimit të Praktikës Profesionale të Integruar të Nivelit, do të llogaritet duke konsideruar vetëm notat e marra gjatë mësimi praktik para datës 09.03.2020, për përmbyshjen e nivelit përkatës.
- h) Nota përfundimtare e Provimit të Teorisë Profesionale të Integruar të Nivelit, për çdo nxënë do të llogaritet duke marrë në konsideratë jo vetëm rezultatet e Provimit të Teorisë Profesionale të Integruar të Nivelit online, por edhe mesataren e notave të të gjitha lëndëve teorike profesionale të zhvilluara në nivelin përkatës.
- i) Formula për llogaritjen e notës përfundimtare të Provimit të Teorisë Profesionale të Integruar të Nivelit është si më poshtë:

$$N = 0,7 K1 + 0,3 K2, \text{ ku}$$

-N është nota përfundimtare (e rrumbullakosur në numër të plotë) e Provimit të Teorisë Profesionale të Integruar të Nivelit.
 -K1 është mesatarja e thjeshtë e notave të të gjitha lëndëve teorike profesionale, që nxënësi ka përmbyshur në nivelin përkatës.

-K2 është nota që nxënësi ka marrë në Provimin e Teorisë Profesionale të Integruar të Nivelit, online.

- j) Për nxënësit që do ta kenë të pamundur të marrin pjesë në provimin e Teorisë Profesionale të Integruar të Nivelit online, por do ta japin këtë provim në një periudhë të mëvonshme sipas pikës 2/i, nxjerrja e notës përfundimtare përkatëse bëhet sipas pikës 3/i të këtij Udhëzimi.

4. Në lidhje me mbylljen e vitit shkollor 2019-2020:

- a) Të gjitha shkollat profesionale duhet të marrin masat e nevojshme sipas Pikës 1/a, b, c të Urdhrit Nr. 103, datë 27.04.2020 të MASR.
- b) Të gjitha shkollat profesionale duhet të marrin masat e nevojshme për plotësimin e dokumentacionit shkollor nga të gjithë mësimmshënësit.
- c) Drejtuesit e shkollave profesionale duhet të raportojnë mbi vijimin e mësimi lidhur me rezultatet dhe problematikat e evidentuara, si dhe mbylljen e vitit shkollor 2019-2020, pranë Agjencisë Kombëtare të Punësimit dhe Aftësive.

5. Ngarkohet për zbatimin e këtij Udhëzimi, Sekretari i Përgjithshëm dhe Drejtoria e Politikave të Punësimit dhe Aftësimit, në Ministrinë e Financave dhe Ekonomisë, Agjencia Kombëtare e Arsimit, Formimit Profesional dhe Kualifikimeve, Agjencia Kombëtare të Punësimit dhe Aftësive dhe shkollat profesionale publike dhe jopublike.

Ky udhëzim hyn në fuqi menjëherë pas botimit në Fletoren Zyrtare.

MINISTRI

Anila Denaj

